

GALATIAFO Paulo Ovoli Kĩ Etsɛɛ ɛma Galatiafo

I Ovoli kĩĩ to yĩ, Paulo, kĩ ãnye Kristo foto onyane a sekẽ. Nnẽ batidziwa lepau yĩ, ãye nnẽ otidziwa akũ bɛtsã bepau yĩ nde foto onyane aye, mbom yĩ kave a to Yesu Kristo mo Baguma boe ɔlega a kĩ edzela Yesu etomena kanokpa a sekẽ. II Bomo nwaẽ ame flee a kĩ bideĩ ne awĩ a, bonɛe ovoli kĩĩ a boawõna tesoli bati a kĩ bideĩ ne Galatia a.

III Baguma boe ɔlega mo boe ɔlate Yesu Kristo bemo mi konya, bekpa mi lukudo lɛmɛ.

IV Yesu Kristo kɔa ye akũ ebɔa afɔlie ne boe tokpa lolɔ, ayekĩ yaanye boe etomena nviã katinya kpa kĩĩ kame, ne Baguma boe ɔlega kawɛ onukpẽ. V Mifõ bumu Baguma kito finyaa kanaa daa! Fɔya lomo.

Baguma Kale Wĩ Mɔape Deĩ.

VI Mi folets a kɛna yĩ wãwã, kitonɛkĩ owi tãbuna kɔlaa kĩ mimuniki ne oti a kĩ etsã Kristo konyakamo kame ɛve mi a liti, ade minaate kale wĩ bebã a. VII Lɛmɛ ne onokɔali kame ni, kale wĩ bebã kadima buki kelãa, mbom bati badi tsẽ babula mi ato kade, ade bawɛ kĩ badani Kristo Kale Wĩ a bekɛna lets a bebã a. VIII Lɛmɛ nte boe, ãye Baguma foto onyane odi malo to ode eyale kale wĩ kĩ kevɛmɛna ne kikĩ ke akũ bude letsã bokpa mi a ni, Baguma edumu ye ekpa lubo kamɔ! IX Kale a kĩ boɛ botẽ a, ade ke a finyaa

mbuki male a. Nle kī nte odi aato ode eyaabi mi kale wī kī kevenena ne kīkī mite a akū ni, Baguma edumu ye ekpa lubo kamō!

^X Fɔletsā a kī male a ni, kale male foe nwo bati ñye Baguma ane mbɔee? Oowo! Kawe mawe kī fuwo Baguma ane. Nte mbuki makena foe fuwo batidziwa ane ni, kufe nláabuki ñnya Kristo ɔsumune.

Ayekī Paulo Yadani Fɔto Ōnyane.

^{XI} Nwaẽ ame, mifō mbi mi yededeede kī Kale Wī a kī ke akū made letsā a lenyé otidziwa kade.

^{XII} Ntáté ke ntomena otidziwa odima sekē ade odima leme tátsa yī ke a, mbom Yesu Kristo mɔawe lenye ke etsa yī.

^{XIII} Minu ayekī ndzi nkpā tō a, kī mpi Yudafō ɔsum a ndomō akū mō ɔsī mō ɔsī. Minu leme ayekī nkɔa koneyɔɔle ntomena asoli bati a liti, mbɔa mbodi kī mawɔla be dzɔɔbii. ^{XIV} Nnaa loto mba yī bakɔba Yudafō pii a kī bómó be bonye letsā ne boe Yudafō ɔsum a kame, ade ntomō boe bawanyɔ temanie a liti mō ɔsī mō ɔsī a.

^{XV-XVI} Leme Baguma ne ye konyakamō kame pau yī eyi malo fómō bema yī, ade ene yī kī ñyasum ye a. Ade kī ewe kī yanye Obi etsa yī ayekī maade letsā ne ye Kale Wī a akū nkpa bikī benyé Yudafō a, ntánaa otidziwa odima sekē kī etsa yī foe tisi. ^{XVII} Ntánaa Yerusalem leme kī manaamō bikī benya fɔto banyane benyaa yī loto, mbom letaleta nnaa Arabia tite akū. Ke liti a, mmuniki nto awā ntē nnaa Damasko.

^{XVIII} Futeli elale liti fómō nnaa Yerusalem kī manaamō Petro. Ndzi ne ye sekē tekwansieda

nviã. **XIX** Ntámŏ foto banyane a kame odima keba Yakobo, boe Olate owaēnyole a.

XX Letsa a kī matselē kī nyē ɔnɔkɔali. Baguma nyina kī nné fɔvã mama.

XXI Ke liti a, ndzakū nnaa fɔkɔ kumekumē ne Siria mɔ Kilikia tite akū. **XXII** Ne lɔkɔ a na kame a, Kristo bate badonē a kī bideī ne Yudea linyina yī ane mɔ ane. **XXIII** Kanu binu ne bati tunukpē kī, “Oti a kī ekatomɔ boe liti kɔkɔe a ni, finyaa kō elamɔ letsã kade ne katekado a kī ewe kī yawɔla a akū!” **XXIV** Ne foesū bimu Baguma ne yī sū.

II

Fɔtɔ Banyane Bebã a Te Paulo Bido Ne Be Kame.

I Ne futeli ewuana liti a, bɔmó Barnaba bubuki bumuniki bɔnaa Yerusalem, ade nkpã Tito lemē nnamena a. **II** Nnaa awã kitonekī Baguma nyē etsa yī kī kenē kī nnaa. Ne bɔmó lɔtɔ banyane a odi katsena kame ni, nkpale fɔletsã kame ntsa be ne Kale Wī letsã a kī nlamena kade kakpa bikī benyé Yudafo a akū. Ntáwe kī adzuma a kī nkēna ntē a, mɔ ekī makēna finyaa a, ekēna fɔtsa pupulidza. **III** Tito kī yī obumenane Tito lenyé Yudani malo ni, odima táhe ye kī etsua lekpati. **IV** Lemē bavãlevã bate badonē badi tsã tɛdake osi akū biwo ne asɔli bati a kame kī banaī bemɔ boe akū akū kadzi a kī bɔna ne ɔmɔa kakēna mɔ Kristo Yesu a. Bēwe kī bakēna boe basate bekpa be temanie a kī benēē a. **V** Lemē ayekī bɔwe kī kale wī a ɔnɔkɔali a edza pintii kekpa mi sū ni, bɔtákpã be osi kolaa.

^{VI} Leme bati a kī badā nde be nye loto banyane a tákpa yī kóde kudima. Leme nte benye bati titiliwu badi malo ni, yī kō ntséla, kitonekī Baguma ládā oti ane. Mbuki male kī loto banyane a tákpa yī kóde vōě kudima. ^{VII} Mbom bemó kī adzuma a kī Baguma do yī ne awe nye kī nde letsā ne Kale Wī a akū nkpā bikī benyé Yudafo a, nde ayekī edo ye ne Petro leme awe kī ede letsā ne Kale Wī a akū ekpa Yudafo a. ^{VIII} Kitonekī fotsā Baguma kōbē akū, bekena yī foto onyane bekpa bikī benyé Yudafo nde ayekī bekena Petro foto onyane bekpa Yudafo a. ^{IX} Yakobo, mo Petro mo Yohanes, kī bekena nde loto banyane a mó biyi osū kī Baguma lido yī adzuma potii kī ne awe. Foesū bigua bomó Barnaba bekōa betsa kī boe flee bonye adzuma moa bakenane. Bōkena onukpē moa kī bomó Barnaba bóakena adzuma ne bikī benyé Yudafo a kame, lokōa be malo bekena adzuma ne Yudafo a kame. ^X Letsa a kī bivia bitomena boe sekē nye kī bute ane ne bate badone ahiāfo a akū, kī fonye letsa titiliwu a kī foasī yī akū kī nkēna.

Paulo Yidza Edza Ne Petro Akū Ne Antiokia.

^{XI} Leme kī Petro ya ne Antiokia a, iyidza ndza ne ye akū ne kanade, kitonekī ekēna letsa kī letáfeta. ^{XII} Fomo batō a kī Yakobo do a ayawo awā ni, Petro kado awe kanya mo bate badone a kī benyé Yudafo a. Leme kī bati a ya liti a, Petro vele ye akū ne be akū, esī kanya mo bikī benyé Yudafo a, kitonekī evila be a kī batsa kī kene kī oti etsua lekpati a. ^{XIII} Yudafo bate badone bebā a do kakēna awe nde babelibe bitomō Petro ne

liti, ade Barnaba malo fõ libe lëkenana kõi nya ye akũ a.

XIV Leme kõi mmó kõi betsé ne onokoli Kale Wi a osi kpõ akũ ni, mbi Petro ne bati a flee ane kõi, “Nte no a kõi onye Yudani, odzi nkpã nde oti kõi enyé Yudani a ni, nde sũ mo finyaakõ kõ ahe bikõ benyé Yudafõ a kõi bidzi nde Yudafõ aye?”

Yudafõ Mo Bikõ Benyé Yudafõ Na Nkpã Kate Betsãmena Katekado Kame.

XV Ne onokoli kame ni, Yudafõ boane kito ne kama kame, ade ke nné bikõ benyé Yudafõ tokpa bakenane a boane. **XVI** Leme bunyina kõi nné oti a kõi yakena ne mbla a akũ nye oti kõi ekpõla ne Baguma ane, mbom oti kõi ete Kristo edo. Boe malo bote Kristo Yesu budo, ayekõ bõakpõla ne Baguma ane kõi bote Kristo budo sũ, leme nné ne mbla akũ kakena sũ. Kitonekõ odima lelãakpõla ne Baguma ane, ne ayekõ yakena ne mbla a akũ sũ.

XVII Foesũ nte boabõa mbõdi kõi boakena bati kõi bekpale ne Baguma ane ne boe omõa kakena mo Kristo sũ, mo bemó kõi tokpa bakenane boane nde bikõ benyé Yudafõ a aye ni, katsa fõatsa kõi Kristo leme tomõ tokpa liti? Oowo, folã lomõ!

XVIII Nte mbuki madzela mbla a akũ kakena a kõi nfõne awe a ni, ke kõ ñnye yĩ akũ kanya nde odi kõi yaádi mbla a akũ. **XIX** Ne mbla a onukpẽ ni, nku nkpa mbla a, ayekõ maadzi nkpã nkpa Baguma.

XX Beboã bomó Kristo ne asendua akũ. Foesũ finyaa ni, nné yĩ moawe a ndzi nkpã, mbom Kristo dzi nkpã ne yĩ kame. Nkpã a kõi ndzi finyaa ne sukena kame a, ndzi ye ne Baguma Obi a kõi yawe yĩ kale, ekõa ye akũ eboã afõlie ne yĩ lolõ

a ne katekado kame. ^{XXI} Maáwe kī masī Baguma konyakamō a. Leme nte oti akpola ne Baguma ane ne ayekī ekena ne mbla akū sū ni, kekō foatsa kī Kristo ku pupulidza!

III

Miakena Ne Mbla a Akū Mbōēē Kī Miate Kristo Mido?

^I Mi Galatiafo kī minyina kadi! Owei koū libula mi lolō kame kade lomō? Mi mōawe ane kame benye betsa mi yededeede ayekī bebōa Yesu Kristo ne asendua akū a! ^{II} Mikpa yī kale mōa kī mbuaye. Baguma Hūhū a kī mite a ni, mbla a akū mikena sū, mbōēē kī Kale Wī a mitse, mite mido sū mite Hūhū a? ^{III} Nde mitene kadzimbi lomō! Mikōa Baguma Hūhū a miyi adzuma kayō a ni, finyaakō miawe kī miwūna ye mō miawe kōbē? ^{IV} Mbōēē fotsa flee a kī foe kame mitsā mitē a dani fotsa pupulidza? Fóláanya fotsa pupulidza da! ^V Ayekī miakena ne mbla a akū sū Baguma kpa mi Hūhū yakena awāwā fotsa ne mi kame, mbōēē ne ayekī mitse Baguma folets a mite foe mido sū?

^{VI} Midā Abraham kadzi kame. Katsēle Kpalēwa a le kī, “Abraham te Baguma edo, ade ne ye katekado sū Baguma te ye nde oti kī ekpola.” ^{VII} Foesū kene kī mianyi kī bati kī bete bido nye Abraham babi mō bawa. ^{VIII} Bele ne Katsēle Kpalēwa a kame biyi kī Baguma aakena bikī benyé Yudafo a bati kpī ne be katekado sū. Ade foesū Katsēle Kpalēwa a bi Abraham Kale Wī a kōkōe eyi kī, “Baguma aatsā nō akū ehila katinya kame fude flee.” ^{IX} Abraham te edo ade Baguma

hila ye a. Foesũ odi nye odi kĩ ɛte edo ni, Baguma ahila ye nde Abraham aye.

^X Leme bati a kĩ bipi mbla a akũ kakena bido mo akũ ni, bidum be, kitonekĩ Katsɛle Kpalɛwa a le kĩ, “Odi nye odi kĩ yaákɛna ne letsa nye letsa kĩ lideĩ ne mbla a kame ni, Baguma dumu ye!” ^{XI} Ne foesũ finyaa foe kame kpale kĩ odima leláapuli ɛkena oti kpĩ ne Baguma ane ne mbla a akũ kakena sũ. Kitonekĩ Katsɛle Kpalɛwa a le kĩ, “Oti a kĩ ɛtsã katekado kame ɛkena oti kpĩ ne Baguma ane a, odi aadzi nkpã.” ^{XII} Leme mbla a letsɛla oti katekado akũ. Mbom Katsɛle Kpalɛwa a le kĩ, “Odi nye odi kĩ yakɛna ne mbla a flee akũ ni, yaatsã foe kame edzi nkpã.”

^{XIII} Kĩ Kristo yadani fudumutsa ne boe lolɔ sũ ni, enye boe etomena mbla kadumu a kame. Kitonekĩ bele ne Katsɛle Kpalɛwa a kame kĩ, “Odi nye odi kĩ bevela ye ne asendua akũ ni, Baguma dumu ye.” ^{XIV} Kristo kɛna fukĩ ayekĩ Baguma nhila a kĩ ɛle eyi ɛkpa Abraham a aata mo bikĩ benyé Yudafo a, ade fɔtsãmena Kristo Yesu akũ, bóatsã katekado kame bote Hũhũ a kĩ Baguma le eyi a.

Ntsitsemu Deĩ Ne Mose Mbla a Mo Baguma Nhihie a Kayite.

^{XV} Nwaẽ ame, mawe kĩ makpa mi kadzi kame nfantuhũ adi. Nte bati nviã kɛna nhihie adi, mo betsele ovoli bido awe ne kayo ni, odima leláapuli enye letsama ñye ɛkoɔ letsa bebã ebu. ^{XVI} Mite ane kĩ Abraham mo ye obi Baguma kɛna nhihie ɛkpa. Katsɛle Kpalɛwa a tále kĩ, “Abraham babi” kĩ fɔatsa kĩ bati beblebee, mbom ɛle

kĩ, “obi” kĩ fọatsa kĩ oti mọape. Ade oti kii nye Kristo a. ^{XXVII} Letsa a kĩ matsa nye kĩ Baguma kena nhiiie ekpa Abraham mọ ye obi, ade eke otse kĩ yaakena ne ye akũ a. Foesũ mbla a kĩ Baguma kpa Mose ne futeli oha ena mọ foe taale liti a, leláapuli edani iye ewola Baguma nhiiie a. ^{XXVIII} Kitonekĩ nte Baguma futetsa a tsã mbla akũ ni, kekõ fubuki fotsé ye nhiiie a akũ. Leme Baguma mọawe nhiiie yane sũ ekọa futetsa a ekpa Abraham.

^{XIX} Kekõ, litsa sũ bekena mbla a? Bekena mbla a bibu ayekĩ oti aamọ letsa a kĩ lenye tọkpa, ade fowaa kenaawo loko a kĩ Abraham obi a kĩ bekpa nhiiie a aaya. Baguma ode foto banyane lekọa mbla a bema oti a kĩ edeĩ ne bati mọ Baguma kayite. ^{XX} Leme kayite onane tásĩ nte fonye kĩ oti mọape akena nhiiie, ade Baguma mọape yane a.

Letsa Sũ Kĩ Bekpa Mbla a.

^{XXI} Katsa fukii atsa kĩ mbla a tia Baguma nhiiie a? Oowo. Fólá lomọ! Kitonekĩ nte batidziwa te mbla adi kĩ yaapuli ekpa oti nkpã ni, kufe odi nye odi aapuli ekena oti kpĩ ne Baguma ane, nte ekena ne ye akũ. ^{XXII} Leme Katsela Kpalawa a le kĩ katinya kame flee deĩ ne tọkpa kobẽ kayo, foesũ futetsa a kĩ Baguma le eyi ne Yesu Kristo katekado kame a waa fọkpa bikĩ bete bido.

^{XXIII} Leme fomọ Kristo katekado ya ni, mbla a pili boe flee edo ne kola nde kola bawane aye, kenawo loko a kĩ baanye Kristo katekado kii kanya. ^{XXIV} Foesũ mbla a lekadamena boe akũ kenawo kĩ Kristo ya, ayekĩ fọatsã boe katekado kame bekena boe bati kpĩ ne Baguma ane.

XXV Finyaakĩ, kĩ katekado a yawo boe kame a, mbla a buki enyé boe ṓdāmenanε.

XXVI Ayekĩ mi flee mite Kristo Yesu mido sũ ni, mi flee midani Baguma babi. XXVII Mi a kĩ bewola mi mui, kĩ mikena ṓmṓa mṓ Kristo a, mido Kristo ndε atadie aye. XXVIII Ne foesũ ntsitsemu adima buki εlāa Yudafṓ mṓ bikĩ benyé Yudafṓ kayite, mṓ basate iye bikĩ bidzi be akũ akũ, mṓ batsole iye banyole, mbom mi flee mikena ṓmṓa ne Kristo Yesu kame. XXIX Nte minye Kristo bade ni, kekṓ minye Abraham babi mṓ bawa, ade miakena fṓtsa a kĩ Baguma ε eyi a banyanε a.

IV

I Lεmε letsa a kĩ matsa nye kĩ obinyole a kĩ εtábo tṓ anε kĩ yaanya ṓlεga adzapadie ni, babu ye ndε ṓsate aye, titṓ kĩ letsa nye letsa nye ye fude malo. II Lṓkṓ a kĩ enye obisḗ a, bati deĩ kĩ badāmena ye mṓ ye fṓtsa a akũ kanaawo lṓkṓ a kĩ ṓlεga yi εkpa ye fṓtsa a katε. III Ade ayea boe malo bona ne hũhũ kĩ yanya katinya kame akũ kayṓ ndε basate aye, keyawo kĩ bubo anε ne hũhũ kṓbḗ kame. IV Lεmε kĩ lṓkṓ wĩ a wo ṓtṓ a, Baguma do ye mṓawε Obi εya. Eya ndε otidziwa kĩ otsole ma aye, edzi nkpā ne Yudafṓ mbla a kayṓ. V Baguma do ye kĩ εyaase kṓtṓ enye bikĩ bideĩ ne mbla a kayṓ, ayekĩ bṓadani bṓkena ye Baguma babi. VI Kĩ Baguma wε kĩ yatsa kĩ minye ye babi sũ ni, εkṓa ye Obi Hũhũ a edo ne boe tṓwṓlε kame. Hũhũ kĩ abṓa fṓwṓla kĩ, “Ao Nda!” VII Ne foesũ obuki ṓnyé ṓsate, mbom ṓnyε obi. Kĩ ṓnyε ye obi sũ ni, Baguma aakṓa letsa nye letsa a kĩ edeĩ εkpa ye babi a εkpa nṓ.

Galatiafo Foletsa Kaha Paulo.

VIII Kókɔɛ a kī minyina Baguma a, minya basate mikpa fɔtsa kumekume kī fɔnyé Baguma. IX Leme finyaa kī minyina Baguma, ñye maale kī Baguma nyina mi a, nde sū miawe kī miamuniki minaa hūhū a kī ɛla kɔbɛ, kī ye akū ako kɔnya a sɛkɛ? Nde sū miawe kī miabuki mikena be basate? X Minye fuwi fudi, tidetɔ tidi, fɔkɔ fudi mɔ futeli fudi koū miyi miakena temanie ne foe akū. XI Mi foletsa aha yī ɔwɔle paa! Fɔakena nde yī adzuma a kī nkɛna ne mi kame a flee kɛna pupulidza.

XII Nwaɛ ame, make mi aduli kī midani mikena nde yī aye, kitonekī yī malo nkɛna yī akū nde mi aye. Mitákɛna tɔkpa tidima ne yī akū. XIII Miate anɛ kī kī ñnya lɔtɔ ñyade letsā ne Baguma foletsa a akū nkpa mi a, nna ne fɔsɔ kame. XIV Leme tito kī ayekī yī akū na a nya sohuisɛ baū fɔkpa mi malo ni, yī akū tákɔ mi kowɛ misī yī kate, mbom mite yī nde Baguma ode fɔtɔ ɔnyane aye, ñye nde ayekī miate Kristo Yesu mɔawe a. XV Kawɔle a kī mimó mɔ ɔmene a kī mido ne yī akū ne lɔkɔ a kame a ni, ne ndia fudeñ finyaa? Yī mɔawe maapuli nle kī nte kapuli miapuli kufe mibɔle mi mɔawe banebi malo mikpa yī. XVI Kadani ndani mi okesīne finyaa kɔ, ne ayekī mbi mi ɔnɔkɔali a sū?

XVII Bati bebā kī a amɔ kawɔle paa ne mi akū, lɛme baákɔna fɔtsa wī ne mi akū. Letsa a kī bawe nye kī banye mi ne yī akū, ayekī miadani mimó kawɔle ne be akū nde ayekī be malo bamɔ ne mi akū a. XVIII Fɔnɛnɛ kī bati amɔ kawɔle ne mi fɔtsa wī kakɛna akū, nte be botae a nɛnɛ

daa, nné nte ndeĩ ne mi sekẽ odi. XIX Yĩ babi kĩ maátunọ kale! Mbuki manu kalọe ne yĩ kame nde ayekĩ seme api omatsõ kakpa mi, kenaawo kĩ Kristo ọbla a aate mi kame. XX Nwe kĩ mana ne mi sekẽ finyaakũ kufe, ayekĩ maadọla yĩ odo ne mi akũ ñnye ayekĩ mila a ntsa. Mi fọletsa aha yĩ ọwọle paa!

Paulo Kọa Hagar Mọ Sara Ekpa Nfantuhũ.

XXI Mi a kĩ miawe kĩ mbla a enya mi akũ a, mikpa yĩ kale kĩ mbuaye. Mbọee mitánu letsa a kĩ mbla a le a? XXII Ele kĩ Abraham ma babinyole nviã, ọmọa nye ye ọsatetsole a obi, ade ọyade a nye osole a kĩ edzi ye akũ akũ a obi a. XXIII Bema ọsate obinyole a nde ayekĩ otidziwa ama obi aye, leme obinyole a kĩ osole a kĩ edzi ye akũ akũ a ma a kọ ni, bema ye betsāmena ne Baguma kale kayi a onukpẽ.

XXIV Fọletsa kĩ ñnye nfantuhũ. Batsole nviã kĩ dzẽ bekpa apam atsu nviã. Be kame ọmọa a kĩ enye Hagar dzẽ ekpa apam a kĩ bekena ne Sinai ọto a akũ a, ade ye babi a kĩ ema a nye basate a. XXV Hagar dzẽ ekpa Sinai ọto ne Arabia tite akũ. Ade ye nye nviã Yerusalem ọmato a, kitonekĩ ye mọ ye bati a flee buki bideĩ ne tesate kame. XXVI Leme ode Yerusalem a nye osole a kĩ edzi ye akũ akũ a, ade ye nye boe ọma a. XXVII Kitonekĩ Katsẹle Kpalewa a le kĩ,

“No oduko, mọ kawọle!

Boa fowọla, kamo kawọle,

no a kĩ ọtámọ tọ kama lubo.

Kitonekĩ osole kĩ ọnyọ letsẹla ye akũ a,

babi aapɔ beba otsole a kɔ ɔnyɔ deɔ ne ye sekɛ daa a bade.”

XXVIII Nwaɛ ame, finyaa ni, mi malo minye Baguma babi ne ye nhihie a onukpɛ nde Isak aye. XXX Ne lokɔ a na kame ni, obinyole a kɔ beama nde ayekɔ otidziwa ama obi keke a yidza edza ne ekɔ beama ne Baguma Hũhũ kame a akũ. Ade aye fubuki fɔla nviã kɔ malo a. XXX Lemɛ litsa Katsɛle Kpalɛwa a le? Kele kɔ, “Blɔmena ɔsatetsole a mɔ ye obinyole a bedzakũ, kitonekɔ ɔsate a obi a mɔ otsole a kɔ edzi ye akũ akũ obi lelãasɛ be ɔlega adzapadie.” XXXI Ne foesũ, nwaɛ ame, bonyé ɔsatetsole a babi, mbom otsole a kɔ edzi ye akũ akũ a babi boane.

V

Mipi Akũ Akũ Kadzi a Kɔ Mina a Kapi Wɔ.

I Akũ akũ kadzi Kristo awe kɔ bona ade foesũ enye boe a. Ne foesũ midza pintii nde bati kɔ bidzi be akũ akũ aye, mitafɔ bibuki bekɛna mi basate.

II Mitse fɔletsã kɔ katse wɔ! Yɔ Paulo mabi mi kɔ nte mifɔ bitsua mi fokpati ni, fɔatsã kɔ Kristo buki elã nfasɔ adima ekpa mi. III Mbuki masipi kɔ nte odi tunɔ bitsua ye lekpati ni, kene kɔ ekɛna ne mbla a flee akũ. IV Mi a kɔ miawe kɔ miakɛna ne mbla a akũ lokɔa minya bati kɔ bekpɔla ne Baguma ane ni, minye mi akũ ne Kristo akũ. Miné ne Baguma konyakamɔ a kame. V Boe kɔ ni, kɔ bɔte budo Baguma Hũhũ a sũ ni, bona ɔwɔle bɔɛ kɔ Baguma aakɛna boe bati kɔ bekpɔla. VI Kitonekɔ nte bokɛna ɔmɔa mɔ Kristo Yesu ni, lekpati katsua ãye de katatsua távɛmena

letsama. Letsa a kī lisī nye kī bóale katekado a kī kakena adzuma ne ɔdo kame.

^{VII} Mikaboa mbodi paa kufe! Owei lisua mi osi kī mitakena ne ɔnokoli osi a akū? ^{VIII} Nné Baguma a kī eve mi a ledani mi adzuni. ^{IX} Bale kī, “Fuyilatsa kabii bakoa kado ne mboli kame fomɔ yayila.” ^X Leme ne boe ɔmɔa kakena mɔ boe ɔlate sū ni, mate kado kī miláabuki mite oti bebā adzuni keba yī ade. Leme odi nye odi kī elamena mi adzuni kadani a ni, nde eti ela o-o, Baguma aavele ye soto kokooko. ^{XI} Nwaē ame, yī kō nte mbuki made letsā kī lekpati katsua sī ni, nde sū bati buki biyidza bedza ne yī akū? Nte fonye ɔnokoli ni, kekō yī letsā kade ne Kristo wuda ne asendua akū a leláyamena ohau odima. ^{XII} Mawe kī bati a kī batutulu mi a bipi akū benaa loto benye be akū tesae lokoa kale kiwoli!

^{XIII} Nwaē ame, mi kō beve mi kī mina mi akū akū kadzi. Leme mitafō mi akū akū kadzi kī lekpa mi osi mikena sukena fowetsa kpa, mbom mikoa ɔdo misum mi akū akū. ^{XIV} Kitonekī mbla a ɔledo flee nye kī, “We nɔ okoba kale nde ayekī awe nɔ akū a.” ^{XV} Leme nte miakena mi akū awoda nde bayae kpa aye ni, midā kadā wī, nte nné aye míawola akū.

Ntsitsemu Deī Ne Baguma Hūhū Mɔ Oti Kutidu Kayite.

^{XVI} Letsa a kī male nye kī mifō Hūhū a ekpā mi ne mi nkpā kadzi kame, ayekī miláakoa akū mikpa sukena fowetsa kpa kakena. ^{XVII} Kitonekī letsa a kī oti kutidu awe a ayidza kadza ne letsa a kī Hūhū a awe a akū. Ade letsa a kī Hūhū a

awe a leme ayidza kadza ne oti kutidu fowetsa a akū a. Fotsa nviã kī akesī akū, ade foatsa kī miláapuli mikena letsa a kī miawe a. ^{XVIII} Foesū nte Hūhū akpā mi ni, mibuki miláa mbla a kayo.

^{XIX} Fotsa a kī oti kutidu akena a ane kawa yedede. Ade foe nye litsolewe mo linyolewe, fotsa a kī foado akū efī, kəkobato, ^{XX} baviõ kasum, mo kabõ kato. Fõbebã nye likesī, õdze kakena, anengbã, kalokpa kana, yī odi fude kale, bati kayale mo kasē ne kutsu kutsu kame, ^{XXI} lineke kanõ, bave kawuga, kawole kamõ mo kuto kpa katē õbē, mo fotsa bebã nde fukī bame. Mbuki made mi finyaa nde ayekī ñnya lotõ nde mi a, kī bikī bakena fotsa kī bame odu a leláanaa Baguma legākanyakõ a kame.

^{XXII} Leme fotsa a kī foane kato Hūhū a kame nye õdo, kawole, lukudo, owole bõee, semekale, tuwī kakena, fotsa kakena ne osi wī akū, ^{XXIII} akū kadõla mo akū akū kanya. Mbla adima leláa kī etia fukī flee kame fudima. ^{XXIV} Bati a kī benye Kristo Yesu bade a, kõa be sukena bebõa bemena ne asendua akū, mo se fowetsa mo obla kpa flee. ^{XXV} Nte Hūhū a akpā boe ni, kekõ mifõ ye ekpā boe ne boe kadzi kame. ^{XXVI} Mitafõ bõdela akū ne ode, ñye budo akū kalokpa, ñye bõna anengbã ne boe akū akū.

VI

Mibumõ Mi Akū Akū Ne Ohau Kame.

¹ Nwaē ame, nte mi kame odi kena tokpa tidi ni, mi a kī Baguma Hūhū a deñ ne mi kame a, mikõa owole bõee mide ye edani owole kame. Midã mi mõawe a akū kadã wī ayekī mi malo

beláaso mi bedã. **II** Mibumena akū akū ne ɔhau adi nye adi kame, lɔkɔa ne osi kī akū ni, míakena ne Kristo mbla a akū. **III** Nte odi abu ye akū kī enye oti odi odu lemɛ ne ɔnɔkɔali kame enyé letsama a, ye odi akū yake. **IV** Odi nye odi edzemo ye mɔawe akū edã. Nte fɔnɛɛ ni, owula aapuli epia ne letsa a kī ekena a akū, ketáne kī yakɔa ye fɔkelatsa ekɔna mɔ oti bebã fude. **V** Kitonekī odi nye odi aalo ye mɔawe fɔlotsa.

VI Nte batsa odi Kristo fɔletsa a ni, kenɛ kī oti a ekpa ye fɔtsa ɔtsanɛ a ye fɔtsa wī flee a kī edeĩ a fudi.

VII Mitake mi akū, kitonekī odima lemɛ leláapuli ebu Baguma tekɔasia. Letsa a kī oti du a, ade foe mɔape a yaana a.

VIII Nte edu fɔtsa ne sukɛna fɔwɛtsa kame ni, letsa a kī yaana etomɛna foe kame nye wuda. Lemɛ nte edu fɔtsa ne Hūhū a fɔwɛtsa kame ni, yaana nkpã kī elá kawūna a etomɛna ye kame. **IX** Mitafõ akpɔ liveli boe ne tuwī kakɛna kame, kitonekī nte akpɔ táveli boe ni, lɔkɔ aaya kī bóana foe akū nfasɔ. **X** Ne foesū kī lɔkɔ buki lideĩ lekpa boe sū ni, mifõ bɔkɛna tuwī bɔkpa odi nye odi, titiliwu bikī bɔmó be bekɛna ɔmɔa ne Kristo katɛkado kame a.

Paulo Kɔde Mɔ Kawõna Nkaɛ.

XI Midã ayekī yī mɔawe nkɔa katsɛle baũ baũ matsɛle mi ovoli finyaa!

XII Bati a kī bawɛ kī bahe mi mitsua fɔkpati a nye bikī bata akū, kawɛ kī bawo bati anɛ. Letsa a sū kī bakɛna fukī nye kī betáwɛ kī bana liti katomɛna ne Kristo wuda ne asendua akū a. **XIII** Bati a kī batsua fɔkpati a malo lákɛna

ne mbla a akũ. Bawe kĩ mitsua fŏkpati ayekĩ baapuli bipia kĩ miakena ne be amanie akũ. **XIV** Leme yĩ kŏ ni, maapia ne boe Ōlate Yesu Kristo wuda ne asendua akũ a odi akũ. Kitonekĩ fŏtsã Kristo wuda kame ni, bebŏa katinya kame ne asendua akũ bekpa yĩ, ade ne Kristo wuda kame leme fŏtsã bebŏa yĩ malo ne asendua akũ bekpa katinya kame. **XV** Nte bitsua odi lekpati ãye betátsua ye ni, fŏnyé letsama. Letsa a kĩ lisĩ nye kĩ oti a dani ekena oti vŏĕ. **XVI** Baguma emŏ bati a kĩ bitomŏ osi kĩĩ ne be nkpã kame a kŏnya, ekpa be lukudo leme. Ekena foe lomŏ leme ekpa Baguma bati a flee.

XVII Kito finyaa kanaa ni, odima etabuki ekpa yĩ ōhau odima, kitonekĩ fuloi ne yĩ akũ a atsa kĩ ãnye Yesu ōsate.

XVIII Nwaĕ ame, boe Ōlate Yesu Kristo emŏ mi hũhũ flee kŏnya. Fŏya lomŏ.

Baguma Apam Vɔɛ a Tuwuli
Tuwuli: Baguma Apam Vɔɛ a Tuwuli New Testament
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

68df0193-2981-5275-8994-8f743fe01e5e